

Bosna i Hercegovina
Federacija Bosne i Hercegovine
TUZLANSKI KANTON

OPĆINSKI SUD U TUZLI

Broj: 032-0-Su-26-000 229

Tuzla, 11.03.2026. godine

Na osnovu člana 31. Zakona o sudovima u Federaciji Bosne i Hercegovine („Službene novine Federacije BiH“, broj: 38/05, 22/06, 63/10, 72/10, 7/13, 52/14 i 85/21), člana 8. tačka j) Pravilnika o unutrašnjem sudskom poslovanju („Službene glasnik BiH“, broj: 66/12, 40/14, 54/17, 60/17, 30/18 i 83/22), u vezi sa članom 14. stav 1. Zakona o zaštiti ličnih podataka („Službeni glasnik BiH“, broj: 12/25), v.d. predsjednika Općinskog suda u Tuzli, dana 11.03.2026. godine, donosi:

PRAVILA PRIVATNOSTI

Cilj Pravila privatnosti Općinskog suda u Tuzli (u daljem tekstu: Sud) je da, u skladu sa članom 68. Zakona o zaštiti ličnih podataka (u daljem tekstu: Zakon), svim licima čije lične podatke Sud obrađuje u okviru postupaka koje provodi, uz izuzetke propisane posebnim zakonom, pruži informacije o obradi njihovih ličnih podataka na transparentan način.

Pravila privatnosti se primjenjuje na sve lične podatke koje Sud prikuplja, upotrebljava ili na drugi način obrađuje, direktno ili putem drugih kontrolora. Prema Zakonu, dole navedeni pojmovi imaju sljedeća značenja:

Lični podatak je svaki podatak koji se odnosi na fizičko lice čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatizovanim ili neautomatizovanim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombinovanje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili s drugim određuje svrhe i sredstva obrade ličnih podataka.

Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

1. Pravni osnov za obradu ličnih podataka

Vaše lične podatke Sud obrađuje u skladu sa članom 8. stav 1. tačka c) i e) Zakona, izvršavajući svoje pravne obaveze i ovlaštenja.

2. Svrha i pravni osnov za obradu ličnih podataka

Vaše lične podatke Sud obrađuje u skladu sa Zakonom, a na osnovu Zakona o sudovima u Federaciji Bosne i Hercegovine, izvršavajući svoje nadležnosti i ovlaštenja.

Navedene nadležnosti i ovlaštenja uključuju:

1) U krivičnim predmetima:

a) da u prvom stepenu sudi:

- za krivična djela za koja je zakonom propisana kao glavna kazna novčana kazna ili kazna zatvora do 10 godina, ako posebnim zakonom nije određena nadležnost drugog suda;
- za krivična djela za koja je posebnim zakonom određena nadležnost općinskog suda;
- za krivična djela za koja je Sud Bosne i Hercegovine prenio nadležnost na općinski sud;
- u svim krivičnim postupcima protiv maloljetnika;

b) da postupa tokom istrage i nakon podizanja optužnice u skladu sa zakonom;

c) da odlučuje o vanrednim pravnim lijekovima kad je to zakonom predviđeno;

d) da odlučuje o brisanju osude i prestanku mjera sigurnosti i pravnih posljedica osude, na osnovu sudske odluke i

e) da postupa po molbama za pomilovanje u skladu sa zakonom.

2) U građanskim predmetima da u prvom stepenu sudi:

a) u svim građanskim sporovima i

b) u vanparničnom postupku.

3) U prekršajnim predmetima da u prvom stepenu sudi.

a) u svim prekršajnim predmetima i

b) odlučuje o zahtjevima za ponavljanje prekršajnog postupka

4) U privrednim predmetima općinski sudovi koji imaju privredna odjeljenja u prvom stepenu sude:

a) u sporovima koji se odnose na prava i obaveze po osnovu pravnog prometa roba, usluga, vrijednosnih papira, vlasničkih i drugih stvarnih prava na nekretninama, te na prava i obaveze proistekle iz vrijednosnih papira u kojima su obje stranke u postupku pravno lice ili fizičko lice koje, u svojstvu samostalnog poduzetnika ili u drugom svojstvu, obavlja privrednu ili drugu registriranu djelatnost u vidu osnovnog ili dopunskog zanimanja;

b) u sporovima koji se odnose na brodove i na plovidbu na moru i unutrašnjim vodama, te u sporovima na koje se primjenjuje plovidbeno pravo, osim sporova o prijevozu putnika;

c) u sporovima koji se odnose na avione, te u sporovima na koje se primjenjuje vazduhoplovno pravo, osim sporova o prijevozu putnika;

d) sporove iz autorskog prava, srodnih prava i prava industrijske svojine;

e) sporove nastale povodom djela za koja se tvrdi da predstavljaju nelojalnu konkurenciju ili monopolistički sporazum;

f) u postupku stečaja i likvidacije, u skladu sa zakonom, kao i u svim sporovima koji nastanu u toku i povodom provođenja postupka stečaja i likvidacije.

5) U drugim predmetima:

a) da vodi izvršni postupak, ako zakonom nije drugačije određeno;

b) da određuje mjere osiguranja, ako zakonom nije drugačije određeno;

c) da rješava u posebnim postupcima, ako zakonom nije drugačije određeno;

d) da obavlja zemljišno-knjižne poslove u skladu sa zakonom;

e) da pruža pravnu pomoć sudovima u Bosni i Hercegovini;

- f) da vrši poslove međunarodne pravne pomoći, ako zakonom nije određeno da neke od tih poslova vrši kantonalni sud;
- g) da vrši poslove upisa u registre pravnih lica i
- h) da vrši druge poslove određene zakonom.

Temeljem zaštite legitimnih interesa, Sud može obrađivati lične podatke prilikom evidentiranja ulazaka u zgradu Suda ili video-nadzora zgrade.

3. Prava nosilaca podataka u vezi s obradom ličnih podataka?

Vaša prava, uz izuzetke propisane posebnim zakonom, su:

- a) pravo na pristup svojim ličnim podacima-u okviru ovog prava mogu se tražiti informacije o svrsi obrade, kategoriji ličnog podatka koji se obrađuje,
- b) pravo na ispravku ličnih podataka-pravo zahtijevati ispravljanje ili dopunjavanje netačnog ličnog podatka ako podatak nije tačan i potpun,
- c) pravo na brisanje ličnih podataka-ako lični podatak više nije potreban za svrhu u koju je prikupljen, ako je nosilac podataka povukao saglasnost na kojoj je obrada utemeljena, ako je nosilac podataka uložio prigovor na obradu u skladu sa članom 23. stav 1. Zakona i ne postoje zakonski razlozi za obradu ili je nosilac podataka uložio prigovor na obradu u skladu sa članom 23. stav 2. Zakona, ako je lični podatak nezakonito obrađen, ako ne postoje drugi pravni osnovi za obradu podataka,
- d) pravo na prigovor-pravo u svakom trenutku podnijeti prigovor kontroloru podataka za obradu ličnog podatka u skladu sa članom 8. stav 1. tačka e) ili f) Zakona, uključujući profiliranje utemeljeno na tim osnovama.

Izuzeci za ostvarivanje prava na brisanje-radi ostvarivanja prava na slobodu izražavanja i informisanja, radi poštivanja zakonske obaveze kojom se zahtjeva obrada propisana posebnim zakonom, a koja se primjenjuje na kontrolora podataka ili radi izvršenja zadataka koji se obavlja u javnom interesu ili u izvršenju službenih ovlasti dodijeljenih kontroloru podataka, u svrhe arhiviranja u javnom interesu, u svrhe naučnog ili historijskog istraživanja ili u statističke svrhe u skladu sa članom 56. stav 1. Zakona, u mjeri u kojoj je vjerovatno da se pravo iz stava 1. može onemogućiti ili ozbiljno ugroziti ostvarivanjem ciljeva te obrade ili radi postavljanja, ostvarivanja ili odbrane pravnih zahtjeva.

Za ostvarivanje svojih prava možete se obratiti ovom Sudu putem kontakt podataka navedenim u ovim pravilima

4. Period čuvanja ličnih podataka

Vaše lične podatke Sud obrađuje u periodu koji je potreban da se ispuni svrha njihove obrade. Nakon prestanka svrhe u koju su prikupljeni, vaši lični podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

5. Tehničke i organizacione mjere zaštite ličnih podataka

Vaše lične podatke Sud obrađuje na način kojim se obezbjeđuje odgovarajuća bezbjednost i povjerljivost kao i odgovarajuća primjena principa zakonite obrade ličnih podataka te smanjenje količine ličnih podataka po principu neophodnosti.

Preduzete su fizičke, tehničke i organizacione mjere zaštite ličnih podataka, koje su propisane Planom sigurnosti ličnih podataka. Svi zaposleni u Sudu potpisali su izjave o povjerljivosti ličnih podataka kojima pristupaju.

6. Prenos ličnih podataka drugim kontrolorima podataka, prenos ličnih podataka u inostranstvo

Vaše lične podatke Sud može dati drugim kontrolorima ukoliko je to potrebno za izvršavanje zakonom propisanih obaveza. Također, vaše podatke Sud neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji ga obavezuje.

Vaše lične podatke Sud daje pružaocima informatičko-komunikacionih usluga s kojima je zaključio ugovor i koji poštuju pravila postupanja s ličnim podacima.

7. Korištenje kolačića i objava sadržaja na web-stranici

Objavljivanje sudskih odluka/presuda i informativnog sadržaja na web-stranici Suda vršit će se u skladu sa zakonima BiH, poštujući princip transparentnosti rada sudova, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

Na našoj službenoj internet-stranici www.opsud-tuzla.pravosudje.ba koriste se obavezni, odnosno tehnički kolačići (engl. *cookies*). Ti kolačići su male datoteke koje omogućavaju ispravan rad internet-stranice i ne možemo ih isključiti, te za njihovo korištenje ne trebamo vašu saglasnost. Obavezni kolačići ne pohranjuju nikakve informacije koje bi vas mogle identifikovati.

8. Promjene Pravila privatnosti

Sud će redovno ažurirati Pravila privatnosti kako bi sadržavala tačne informacije. O svim izmjenama i dopunama bit ćete blagovremeno informisani u skladu sa principom transparentnosti.

9. Službenik za zaštitu ličnih podataka

Alma Dubravić Mahovkić, šef Odsjeka za odnose sa javnošću
e-mail: alma.dubravica@pravosudje.ba
Tel: +387 35 307-223

Osnovna uloga službenika za zaštitu ličnih podataka je davanje savjeta i preporuka o obradi ličnih podataka rukovodstvu i zaposlenicima Suda koji rade na poslovima obrade ličnih podataka, te nosiocima ličnih podataka čiji se lični podaci obrađuju od strane Suda.

10. Podaci o kontroloru podataka

Općinski sud u Tuzli, ZAVNOBIH-a bb
Tel: +387 35 307-200
Faks: +387 35 307-25



V.D. PREDSJEDNIKA SUDA

Dr. sci. Almira Selimović Halilčević